

金石錄補

金石錄補續跋卷第五

崑山葉奕苞九來著

魏受禪表

魏百官公卿奏

魏孔子廟碑

吳天璽元年紀功碑

晉太公碑

僞漢司徒劉雄碑

趙橫山李君神碑

後魏孔宣尼廟記

後魏御射碑

梁開善寺大法師碑

後魏兗州太守張猛龍碑

後魏張猛龍碑陰

東魏孔子廟碑

後周華嶽廟碑

北齊隴東王感孝頌

隋齊國太夫人楊氏墓誌

隋龍藏寺去碑

隋啟法寺碑

隋孔子廟碑

唐等慈寺碑

唐三龜記

唐益州學館廟堂記

魏受禪表

右魏受禪表云惟黃初元年冬十月辛未皇帝受禪於漢氏蓋記受終踐阼月日也魏志庚午王升壇卽阼歐陽公据裴松之註及此碑證庚午之誤固矣漢獻帝紀曰辛未魏王登壇受禪公卿列侯諸將匈奴單于四夷朝者數萬人陪位燎祭天地五嶽四瀆遂制詔以延康元年爲黃初元年夫改元在卽位以後事不應初受禪時竟書黃初意者與嗣君卽位踰年改元不忍沒其親之殘年不同耶其文有云堯舜之事復存於今是言漢

獻下禪于魏也魏氏春秋曰帝升壇禮畢顧謂羣臣曰  
舜禹之事吾知之矣是言已之受禪于漢也不直以已  
無媿于舜禹故爲此言而是時公卿大臣又以天下後  
世爲可欺復勒此表說文云表識也所以揭其事而記  
之也成湯放桀曰予有慚德恐來世以爲口實魏之君  
臣良心陷溺至于乃爾遂借堯舜爲口實唐虞受禪果  
若是乎歐陽公曰嗚呼漢魏之事讀其書者可爲流涕  
信然也又云受禪碑世傳爲梁鵠書而顏真卿又以爲  
鍾繇書莫知孰是宣和書譜据劉禹錫云王朗文梁鵠  
作字鍾繇刻石世稱三絕云

魏百官公卿奏

按紀延康元年十月乙卯冊詔魏王禪代丕上章辭讓再四尙書令桓階等奏亦再四此表則相國安樂侯歆等最後之奏也魏志注載其文甚長碑已殘闕祇拓前一段矣蓋在延康末革命之時趙目列於受禪表後似誤或因黃初中刻石故後之耶

### 魏孔子廟碑

右碑額篆書魯孔子廟之碑黃初元年命孔子廿一世孫議郎孔羨爲宗聖侯奉孔子祀之詔及紀事之文也有云咨可謂命世大聖億載之師表者已咨歎聲一字爲句東魏孔廟李仲璇碑亦有咨可謂開闢之儒聖無窮之文宗者矣意當時文體如此虞書二典用咨發端

金石錄卷第五  
三  
者甚多古人重其事重其詞則爲嗟歎之聲以聳人聽  
非若後世之用噫嘻吁等字止于悲涼感慨也

### 吳天璽元年紀功碑

此吳巖山紀功德石在江寧府天禧門外俗名三段石  
宋元祐六年轉運副使胡宗師輦置漕臺後圃自有跋  
按吳天冊元年吳郡臨平湖開于湖邊得石函函中有  
小石青白色長四寸廣二寸刻上作皇帝字于是改元  
天璽立石刻于巖山紀吳功德乃東觀令華嚴文皇象  
書碑中有東觀令而闕其名必弼也黃長睿曰皇象書  
人間殊少惟建康有吳時天發神讖碑若篆若隸字勢  
雄偉相傳爲象書葛洪曰吳之善書則有皇象劉纂岑

伯然朱季平如中州有鍾元常胡孔明張芝索靖各一  
邦之妙也巖山卽絳巖山舊名赤山唐改今名在句容  
縣臨平湖上所謂鄱陽言厯陽山石成字者在天璽改  
元之八月非此也

晉太公碑

小司馬索隱註譙周曰姓姜名牙炎帝之裔伯夷之後  
掌四岳有功封之于呂子孫從其封姓尙其後也則牙  
與尙爲兩人明矣下又云文王得之渭濱云吾先君太  
公望子久矣故號太公望蓋牙是字尙是其名後武王  
號爲師尙父又以牙卽爲尙何也尙書顧命有齊侯呂  
伋使太公望在安得不敘于召公之前而稱伋乎紀年



所謂康王六年卒者謬又有紫微斗數謂太公望一百六十歲者尤誕妄汲縣令盧無忌者太公之裔孫也

僞漢司徒劉雄碑

通鑑晉愍帝建興三年三月漢大赦改元建元是碑立於二月故稱嘉平五年也考異曰十六國春秋建元二年在晉建興二年同編修劉恕言今晉州臨汾縣嘉泉村有漢太宰劉雄碑云嘉平五年乙亥二月六日立則改元在二月以後從之道譜所謂四年改元者特未註明耳

趙橫山李君神碑

陳鴻大統歷石虎卽位改建平五年爲延興明年改建

武按三十國晉春秋不記石宏改元延熙虎之立實延熙元年誤云永熙也考異曰鴻所云改建平五年爲延興卽是宏踰年不改年耳按成帝紀石勒死于咸和八年之七月而載紀則曰咸和七年宏讓位於季龍季龍怒遂以咸和七年逼立之改年曰延熙似不踰年卽改元矣帝紀宏之改元在咸和九年之正月石虎之弒宏自立爲天王在十一月通鑑虎之改元建武在明年咸康元年之正月特載記於居攝下連書改元實與帝紀無異證之此碑益信矣

後魏孔宣尼廟記

右記不知何人所撰其文詞古質可喜記云孔子欲北

金石錄卷第五  
王  
從趙鞅聞殺鳴犢遂祖車而返按祖廣韻云祭祖疑逗  
字之借說文逗止也逗遛不進之意或作逗逗掬也曲  
禮受珠玉者以掬註云兩手承之恐失墜也聖人憑軾  
敬慎若恐失墜有似兩手捧持之意則逗字爲得且手  
傍與示相近也

### 後魏御射碑

右後魏宣武御射碑趙氏以碑云維魏定鼎遷中之十  
載據孝文弔比干文云太和十八年遷都洛陽至宣武  
景明三年止九載碑作十載者誤予考北史及魏書皆  
云十七年十月戊寅經始洛京乙巳詔安定王休迎家  
口于代十一月癸亥宮成作碑者直以孝文宮成臨御

迎家口之年爲遷都之始未嘗誤也至云宣武生于太和七年癸亥至景明三年壬午當年二十而碑云十七當以碑爲據抑知宣武卽位在太和二十三年己卯適當十七作碑者是數其卽位之年也若據碑削去三年可乎趙又以宣武終于延昌四年乙未爲壽三十五歲而以史云壽三十三誤者殆未取甲子紀元詳審之耳

### 梁開善寺大法師碑

右碑又名智藏法師碑梁湘東王蕭繹撰銘新安太守蕭幾作敘尙書殿中郎蕭挹書世號三蕭碑法師姓顧氏幾挹皆稱弟子歐陽公云衰世之弊遂至于斯余不忍遽棄者以其字畫佳也黃長膚云楷法自鍾元常後

惟江左諸賢頗得之故蕭殿中書此碑古雅可嘉是則古碑因書而存者也書碑必屬名手有以哉

後魏兗州太守張猛龍碑

右魏魯郡太守張府君清頌之碑其額正書諱猛龍字神回南陽白水人延昌中奉朝請熙平中除魯郡太守蓋郡人頌德碑也以其興學校尙絃歌碑猶在曲阜先師廟中按猛龍八世祖西平武公軌當晉崇尙莊老之時在涼州徵胄子五百人立學校春秋行鄉禮禮元魏後佛比清譚尤甚而猛龍獨能講德肄業重道隆師繩祖武違俗尙可謂介然特立之君子矣朱彝尊以子過大同問拓跋氏故都觀所鑿佛宮穹碑巨碣已無存者

而斯碑在孔氏之庭歷千年不壞雖更歷千年知莫有  
徙而去之者此子之所深感也嗚呼爲政之君子可以  
知所務矣又按道武天興四年釋菜于先聖先師孝文  
延興三年封孔子二十八代孫乘爲崇聖大夫孝明正  
光二年幸國子學祀孔子以顏回配此碑立于正光三  
年之正月不獨猛龍之政崇禮讓亦其君有以倡之也  
碑文雋永開齊梁風致所用論語有勝殘不待賒年政  
成期月而已說文賒貰買也一曰遠也徐鉉曰遲緩爲  
賒以賒代百豈所傳有異詞抑文人好奇之故耶東家  
雜記孔乘爲二十七世孫與魏紀異頌辭後列義主十  
人皆郡屬吏所謂本郡二政主簿不知何官卽義主亦

不見於他碑豈義士義民之類耶

後魏張猛龍碑陰

右碑陰之額丞一人中正二人功曹史一人督魯弁新

陽主簿一人督汶陽弁二縣令

下魯汶陽鄒陽平弁新

陽縣令六人下書魯郡士望等一行後列八十餘人次

郡屬吏次六縣族望各百人而漫滅者多矣弁卽卞漢

舊縣豈弁與卞可通用耶自晉以後中原士族淪陷已

久此碑明書士望與族望標榜之意寓焉曲禮司士註

士是官之總名或係魯郡之士大夫也如祖曹集曹二

掾爲官之異星條若雋四姓公乘常邱二姓爲姓之異

白法相李神虎苗桃符張苟生管幽州鮑黃頭爲名之

異羌氏亂華屢更官制改竄士籍若輩仰附華風勒名碑碣所謂附驥之蠅不止千里且千秋矣顧氏金石文字記曰其陰書陽原縣義士州主簿王益生造頌予在廟中閱此行在碑之正面非陰也另一行有造頌四年諸字在正光三年正月之上似記造頌四年之後始立此碑非王益生之文也況同列者十人而王益生下並無他字矣

東魏魯孔子廟碑

右碑興和三年十二月兗州丞令士民頌太守李仲璇也魏書本傳以改修孔子廟爲仲璇一生政績始知當時尊崇聖道者鮮矣碑云君姓李字仲璇趙國柏仁人



也自晉以後名字不辨或以字行故字與名皆諱之仲  
璇以字爲名非別有名也乃李順之族子而順傳爲趙  
郡平棘人按柏人屬南趙郡豈以順父系爲平棘令因  
家平棘故順傳據之而其初居柏人耶碑係仲璇治充  
時立不應有誤第柏人爲漢縣卽魏地形志皆作人此  
曰仁又何也傳云奉朝請定雍二州長史碑則云奉朝  
請俄除定州平北府法曹參軍仍漢三功曹參軍事定  
相離三州長史傳云營構將作碑則云營構都將其衛  
將軍車騎將軍衛大將軍金紫光祿大夫左光祿大夫  
爲碑所遺至將作大匠驃騎大將軍青州刺史爲兗州  
以後除贈之官也顧亭林曰一行之中有篆有分有隸

有草雜亂無倫而以爲奇然則作詩者亦當一句騷一句漢魏一句選一句律而後爲奇也乎

後周華嶽頌碑

右碑在今華陰縣西嶽廟中周天和二年十月十日立使持節驃騎大將軍開府儀同三司大都督司宗治內史臨淄縣開國公万紐于瑾造此文車騎大將軍儀同三司縣伯大夫趙興郡守白石縣開國男南陽趙文淵字德本奉敕書自隋以前書撰人用官階者始於此碑然猶書在年月之後万紐于山名也在陰山之北見于烈碑烈之遠祖居于山下遂以爲姓魏孝文賜改于氏至周而復也按史萬紐于瑾本姓唐以慕于瑾賜改爲

萬鉏于氏本傳不言臨淄郡公而見于李昶傳又文深傳少學楷隸雅有鍾王之則當時碑榜惟文深及冀儁而已太祖命同黎景熙沈遐等刊定六體行于世及王褒入關貴遊等翕然並學褒書文深慙恨後知時尚難違亦習褒書竟無所成轉被譏議觀此碑文深雖自矜貴既著其名復標其字而筆致庸下難以俗體所謂鍾王之則特史臣諛詞耳太師大冢宰晉國公者字文護也護爲武帝之兄故曰任屬阿衡親惟旦奭也瑾爲司宗中大夫兼內史文深爲縣伯下大夫與此碑小異

北齊隴東王感孝頌

右碑云開府儀同三司尚書右僕射尚書左僕射尚書

令攝選新除特進賜持節齊州刺史隴東王胡長仁出  
牧東秦訪郭巨之墓云云按長仁無傳齊紀天統四年五  
月以尙書左僕射胡長仁爲左僕射十月以左僕射爲  
尙書令其除齊州刺史封隴東王皆不載可以補史之  
闕當時陸令萱和士開韓長鸞等各引親黨官由賄進  
超居非次庶姓封王者百數則長仁之封隴東亦當由  
令萱等所引觀其挾妃息以游覽定非納身軌物者故  
史臣不爲之立傳歟書撰人不直書姓名而于文中見  
之有中兵參軍梁恭之盛工篆隸騎兵參軍由嗣邕微  
學摘藻似爲碑文變式也

隋齊國大夫人楊氏墓誌

右楊氏墓誌跋云夫人字季姜僕射高潁母也蓋趙氏誤以潁作潁予家藏金石錄乃先文莊公手訂抄本爲潁字疑其有誤及借王宛仲氏徐原一氏兩家抄刻本皆同始知從趙氏初本遺誤特爲跋正無使後學承認也後有唐贈潁禮部尙書詔跋亦然恐傳寫人之失爾

隋龍藏寺碑

右龍藏寺碑隋開皇六年恆州刺史鄂國公金城王孝儒立齊開府長史兼行參軍九門張公禮撰顧炎武曰齊亡入周周亡入隋而公禮猶書齊官蓋君子之能不降其志而其時之人亦不以爲非也余考顏之推仕歷周隋而家訓中猶謂梁爲本朝蓋同此意其時南北分

疆興亡迭代爲之臣者雖不獲一節以終而心之所主見于稱名之際者固較然不易如此然則今人之不及古者又豈獨書法之陋文字之訛而已哉

隋啟法寺碑

右啟法寺碑儀同三司樂平縣開國子汝南周彪撰闕州前從事譙國丁道護書碑云開皇四年四月一日創立此寺開皇八年開府吏部尙書上庸公京兆韋世康魏司空文惠公之長孫周高士道遙公之元子爲行臺僕射又云公乃出晉烈宗之世前金像寺道安法師所造丈六金銅無量尊像像身旣毀石趺猶存又云舍父衣資服翫廿四件并見錢付寺成此尊儀後云大隋仁

壽二年歲次壬戌十二月甲戌朔十五關建隴西李寶  
鑄施地主胡粲熊璿等歐公謂開皇仁壽時碑往往不  
著名氏惟道護能自著之然存者尤少余家集錄千卷  
止有此耳古人云百不爲多一不爲少者正謂此也子  
于京師孫氏見之精采奪目在率更河南以上後至嘉  
興訪曹侍郎一見卽語子曰新得丁道護啟法寺碑天  
下惟此一本開卷見研山齋圖記知爲孫氏物予惜此  
碑旣爲希世之珍歐陽公雖愛其書不著立碑始末趙  
氏有目無跋特畧其文而存之

隋孔子廟碑

右碑額篆書末云大隋大業七年辛未七月甲申朔二

日乙酉濟州秀才前汝南郡主簿仲孝俊文孔子卅十  
一世孫孔長名卅十四世孫孔子歎監修廟陳明府名  
叔毅字子嚴陳高宗四十二子八子未及封叔毅其一  
也是時孔子卅二世孫嗣愬封紹聖侯長名其叔父  
行也長名之兄長孫襲封鄒國公自後周改恭聖爲鄒  
國至隋而復名紹聖適叔毅令曲阜時重葺廟廷故立  
此頌以美之其文有堯之禪舜實釐女子有虞周室封  
陳亦配姬于嬀滿書傳釐理也舜以義理降下帝女之  
心居于嬀水之內此曰釐女子有虞成何解乎滿者陳  
胡公滿也嬀字應屬上句而曰嬀滿錯謬甚矣自漢以  
後秀才爲異等文如仲俊豈應察舉及之宜今日自負



爲秀才者總總林林將數見之不鮮也

唐等慈寺碑

右碑係裴成者無額題亦無建碑年月末云通議大夫  
行秘書省兼輕車都尉琅玕縣開國子臣顏師古奉敕  
撰新唐書貞觀三年閏月爲兵死者立浮圖相營唐書  
三年十二月癸丑詔建義已來交兵之處爲義士勇夫  
殞身戎陣者各立一寺命虞世南李百藥褚亮顏師古  
岑文本許敬宗朱子奢等爲之碑銘以紀功業此其一  
也碑云念彼王充倫安假息憑陵齊岱薦食徐宛又云  
爰立此寺賜號等慈境實鄭州縣稱祀水蓋碑立于汜  
水追薦討王世充陣亡之士也按武德九年六月太宗

居春宮總萬機下令曰依禮二名不偏諱今官號人名  
公私文籍有世及民兩字不連讀者並不須諱此云王  
充去其世字何也豈上雖弛禁而臣子不敢斥言之也  
耶許洛仁碑云王充跨據伊瀍實德并吞趙魏意當時  
行文習尚乃爾然貞觀中建成豈在諱名之列而云實  
德則又何也或于聲病對偶致工文體別無義例耳

### 唐三龕記

右記無題額後魏及唐鑿佛像于河南龍門山壁間大  
小數百惟三龕最大唐魏王泰爲長孫皇后造兼中書  
侍郎岑文本撰記起居郎褚遂良書以楷兼隸絕不類  
文皇哀冊聖教序諸碑歐公所謂尤奇偉也按史長孫

皇后疾亟太子請汎度道人后曰佛老異方教耳上所  
不爲豈宜以我亂天下法古今稱之中庸以繼志述事  
爲孝而泰爲其親之所不欲爲文德在天將無恫耶泰  
乘太子承乾病蹇起奪嫡之謀旣而承乾敗岑文本劉  
洎請遂立泰爲太子後太宗廢承乾并幽泰史稱家法  
之正記云魏王體明德以居宗膺茂親而作屏朝讀百  
篇日擣三賦發揮才藝兼包禮樂通神曰孝長人稱善  
等語皆泰廣引賓客要結朝臣榆揚才德以窺宗器之  
證文本曲筆不能如褚遂良疏諫料物踰嫡魏徵諫止  
居武德殿爲可媿然遂良亦書此記豈泰狡謀未盡發  
露耶年月處殘泐存歲在辛丑四字按長歷爲貞觀十

五年正泰乘小輿入朝寵冠諸王之日使太宗裁抑有素泰之驕險不至乃爾後雖秉正廢黜而恩義乖矣文王世子之篇所以爲千秋龜鑑也

唐益州學館廟堂記

右記顏有意書趙氏云集古錄直以爲有意撰非也考歐陽公集古此目下亦云有意書未知趙氏何以遽謂集古之誤第歐陽公云高朕之名于義不安疑有意得於古碑之訛缺爾蓋朕者天子自稱之名故曰不安然爾雅註云古者貴賤皆自稱朕又云賚朕畀予也註賚畀皆賜與猶予也則朕似亦可以命名按洪氏隸釋婁氏漢隸字源作高朕其釋爲幾微萌兆又未知何據也

金石錄補續跋卷第六

崑山葉奕苞九來著

唐散騎常侍張後允碑

唐道因法師碑

唐于志宣碑

唐明徵君碑

唐李勣碑

唐天后少林寺碑

唐高士廉塋兆記

周明堂令于大猷碑

周孝明皇后碑

唐有道先生葉公碑

唐贈歙州刺史葉慧明碑

唐于知微碑

唐易州刺史田仁琬德政碑

唐雲麾將軍李秀碑

唐兗公頌

唐貞一先生廟碑

唐東方朔畫贊記

唐宴濟瀆記

唐梁思楚碑

唐王粲石井欄記

唐太尉李光弼碑

唐小字麻姑仙壇記

唐散騎常侍張後允碑

右碑無書撰人姓名及建碑年月前後磨滅已極中有金紫光祿大夫張允知爲允碑又有顯慶三年正月遘疾等字知爲唐人也趙錄張後允碑有目無跋亦註顯慶三年三月無書撰姓名予意卽此碑但後允係二名而此單名張字下更無殘泐何也唐書後允傳字嗣宗蘇州崑山人碑云祿賜防閣陪宴昭陵又與傳合豈嗣宗有二名耶抑後字爲衍文耶傳止載後允之子齊王與鎰而碑中未泐處有第三子謙第四子翼第五子律

師泗州司馬第六子小師第七子統師太常丞第八子  
下闕不獨補史傳之遺亦以證吾邑之誌爲未備也邑  
誌有張承休爲後允之孫恆州刺史多惠政而唐書不  
載孔子曰于其所不知蓋闕如也疑以傳疑直以爲張  
允碑亦可

唐道因法師碑

右多寶寺道因法師碑云中臺司藩大夫隴西李儼字  
仲思製文奉義郎行蘭臺郎渤海縣開國男騎都尉歐  
陽通書龍朔三年十月十日建唐百官志有品有階有  
爵有勳以大夫入銜者惟左諫議大夫諫議大夫御史  
臺大夫而已若文官散階自光祿大夫至朝散大夫凡



十一階而無司藩大夫自朝議郎至將仕郎凡十六階有奉議宜義而無奉義龍朔二年改尙書省曰中臺自尙書令而下以六尙書爲屬未嘗有司藩也或者在宗正寺之屬然改曰司宗而非司藩也改秘書省曰蘭臺秘書郎曰蘭臺郎其曰行者以奉義之下連用郎字恐階與職不辨也歐陽公云唐之盛時職有常守位有常員其爲法則精而密其施于事則簡而易行至于交侵紛亂者由其時君徇一切之苟且故其官益冗名類繁多莫能徧舉卽此碑司藩奉義在當時爲顯著之名至于今不可考究則官制之弊槩可見已縣開國男從五品爵也而勳級騎都尉亦從五品奉義或卽奉議與秘

書郎皆從六品勳爵在階品上二等者或以賢能或以功績轉而上之也當時雖從五品皆有勳爵鼓勵之意寓焉今則貴賤懸殊五等之列無幾人矣

唐于志宣碑

右碑趙氏据志宣自冠氏縣長厯官同中書門下三品證新舊史之脫漏顛倒詳矣尚有未盡者如碑云曾祖謹祖義父宣道義仕隋爲名臣自有傳史乃遺之以冠氏爲清河者新史也卒于麟德二年舊史與碑同則劉氏之書未敢盡以爲可議已

唐明徵君碑

右碑題云攝山棲霞寺明徵君之碑御製高正臣行書

王知敬篆額上元二年歲次景子四月廿五日建唐有  
兩上元此景子者高宗之紀年也趙氏曰徵君者梁明  
山賓也高宗朝其裔孫崇儼以方伎進故立此碑唐史  
言高宗自製文而書之非也顧亭林亦曰崇儼傳潤州  
栖霞寺是其五代祖山賓故宅帝特製碑文親書于石  
論者榮之今按此碑乃高正臣書史家以御製并訛爲  
御書耳曾不据碑駁正予特申其說按碑云南齊徵君  
明僧紹者太原人也初序其隱遁之高繼言栖霞之勝  
而以度人賜經錢絹等物終之則立碑者以僧紹非山  
賓審矣梁書山賓傳父僧紹隱居不仕宋末以國子博  
士徵不就而山賓官侍中舊書竟以侍中爲處士德甫

復以此碑之僧紹爲山賓何耶齊書僧紹傳永明元年以國子博士徵不就卒故此碑云南齊徵君梁書所云宋末徵者亦誤然傳云子元琳字德璋而無山賓齊書修于梁山賓爲梁大臣而反遺之何也碑又云法師僧辨爰來至止別起梵居栖霞之寺由此創名蓋辨依紹建寺並非明氏故宅使高宗寵加崇儼宜于碑末及其名字卽山賓亦未之及未知劉氏何据舛謬至此新書削去製碑一語有以哉

唐李勣碑

右碑題云大唐故司空太子太師上柱國贈太尉楊州大都督英貞武公李公之碑高宗御製御書英者國封

貞武其謚行文簡淨王言宜爾也趙氏云新舊史皆云  
年八十六而碑云七十六按舊書無此語其語諸子曰  
我山東田父耳位三公年將八十非命乎固與碑合也  
新書改將字爲踰誤矣勛本徐氏名世勛傳云至高宗  
時避太宗偏諱故但名勛而此碑王世充世字特缺中  
一筆未之避也虎嘯龍騰改虎爲贊以避高祖諱廣韻  
作贊胡猷切削一虎者俗體也亦缺一筆與周孝明皇  
后碑簾字號字末筆皆不全同爾雅贊有力註出西海  
大秦國有養之者似狗多力獷惡沈佺期杜甫詩中皆  
用贊字惟蘇文舉開業寺碑用此體耳竊謂勛起降虜  
得與顧命高宗廢后立昭儀依回容祿與許李同譏所

金石錄卷之六  
五  
謂大臣以道事君者固若是耶雖保首領于生前卒以  
其孫敬業舉兵討武氏至于掘冢暴骨亦可哀已若敬  
業者事雖不成不謂之蓋愆不可又按勣常具疾醫待  
鬚灰太宗乃白剪鬚和藥賜之勣姊病自爲粥而燎其  
鬚一傳之中鬚事兩見君臣誼篤姊弟情真求之今日  
蓋亦鮮矣而碑不之及豈傳聞有未實乎碑云先朝東  
征大破駐蹕授靈州道安撫大使雖于勣之遷除無甚  
關係亦足以補史之缺

唐天后少林寺碑

右碑武后幸少林寺之詩按唐紀永淳二年十二月丁  
巳改元宏道碑建干九月猶稱永淳也裴灌少林寺碑

云永淳中御札飛白書一飛字于寺壁后必以此時從駕也后擅朝政預廢立永隆元年立英王哲爲太子永淳元年孫重照生立爲皇太孫百官志太孫不懂官屬惟王府傳而下有諮議參軍一人正五品秩至天授二年始置皇孫府官而碑云太孫諮議者是年皇太子朝于東都太孫留守或暫置諮議以他官攝之也司門郎中屬刑部掌門關出入之籍關遺之物尙有詰姦除暴之意後世關差分屬戶工二部而詰姦除暴爲具文矣此則古今官制之異附記焉

唐高士廉塋兆記

右高士廉塋兆記止存上二尺許可拓者額篆書云尙

書右僕射司徒申文獻公塋兆記蓋陪葬昭陵稱碑者甚多此獨異也新書封許國公此云申文獻者加封之國與謚也舊書前云封許國後云太子令曰攝太傅申國公與碑合士廉名儉以字行畫像凌煙閣撰文思博要一千二百卷上之皆爲新史所遺

周明堂令于大猷碑

右首二行殘缺書撰姓名皆無考序云其惟明堂縣令東海于公平公諱大猷字徽本曾祖宣道祖志宣父載政載字疑歷官自左千牛衛率蘇州司兵參軍并州士曹參軍汾州長史隨州刺史以聖歷三年七月卒十一月葬三原縣萬壽鄉如云二十弱冠回鶻拂羽及安仁七



旬不遇箱中之術殆歿而無子其兄兗州刺史辯機葬之故有鶴鴒懷斷鴻鴈悲鳴之語細閱官階無所謂明堂令者而趙氏目則云明堂令于大猷碑豈以其序首之文錄之或當時碑未殘闕其額與題尙有據耶按志宣傳舊書子立政元孫敖休烈休烈子益新書休烈敖益肅球珪璠琮如大猷父子兄弟皆不載可以補于氏之缺也正書酷似褚登善于聖歷中不用武后所置諸字尤爲僅見云

周孝明皇后碑

右碑題曰大周無上孝明高皇后碑銘并序特進太子賓客監修國史上柱國梁王忠三思奉勅撰太子左奉

裕率兼檢校安北大都護相王惠旦奉勅書此武后追尊其母楊氏之碑相王者睿宗也罔卽國惠卽臣武后所制之字也唐君臣正論武后改易新字內以山水土爲地十千万萬爲年永主久王爲證長正立爲聖一生爲人一人大吉爲君而此碑君字又作罔顧亭林云疑古女君字亦類此劉三吾傳謂太甲上篇自周有終相亦惟終周當爲君字之誤按武后紀天授二年立武氏七廟追尊太皇曰太祖孝明高皇帝楊氏曰孝明高皇后又十一年而立此碑號順陵先天中詔削土號僞號仍爲太原王七廟遂廢不聞有議及陵者虞世南所書孔子廟堂碑亦相王旦書額云大周孔子廟堂之碑文

宗時馮審爲祭酒請琢去周字而土獲兩碑至今猶存何也

唐有道先生葉公碑

右碑題云唐故有道先生葉公神道碑括州刺史江夏李邕文并書先生諱國重字惟鎮慧明之父法善之祖也其文云是獻封章願拜墳墓有軫帝念載形王言此必越國請于朝而贈以有道之謚文又云文王之允乃食于沈尹戍之子載封于葉而歛州碑則云晦季食沈子高封葉兩碑世系互相發明始信歛州碑亦邕文也毛氏曰姓氏之葉從葉俗作葉歐陽氏曰作葉非而春秋魯論史記諸書皆從葉相承已久惟篆書今或作葉

耳按李傳卒于天寶中世傳越國攝北海兗撰文及書者矣

唐贈歙州刺史葉慧明碑

右碑趙錄云韓擇木撰并八分書按碑題之次行有江夏李國子口太學生則撰文者非擇木也碑云公諱慧明字德昭南陽郡人以子越國公法善貴贈歙州刺史碑立于開元五年之七月是年三月立有道先生碑爲李邕文則此文亦邕撰無疑故有道碑序其祖乾豈考道與子慧明而是碑不及有道名字似出于一人之手故畧之也擇木初爲太學生後爲諸王侍書樂州司馬此碑書法在史惟則梁昇卿上固非韓不能但碑

詳越公道法之高遭遇之渥所謂時更四紀代且五王者高中睿元四宗與天后爲五也新舊書皆云開元八年卒又云生于大業丙子死于開元庚子凡一百七歲若卒于八年庚申止一百五歲況開元無庚子必史家傳聞之誤也越公傳云括州括蒼縣人而有道碑又曰南陽葉縣人豈兩碑溯其始封傳則据其譜籍耶吾宗得姓固本子高而南陽舊譜自子高而下二十八世諱續者渡江居徽州其家處州者諱儉晉折衝將軍括蒼太守十四世至乾昱又四世至法善又五世至刑部侍郎逵居吳中又五世至石林公諱夢得又十三世而至余七世祖文莊公諱盛則越國傳云括蒼人無誤也葉

金石錄卷第六  
氏雖微姓纂姓林皆與崔盧裴李齊列唐文皇之序大  
姓也謂之京南葉氏然石林公譜序稱七世祖彪是生  
侍郎逵而石林之子模祠堂記又曰越國五世生信州  
守雄石雄石孫元爲烏程令生侍郎逵父子序記舛異  
乃爾傳信傳疑付之闕如而已顧亭林云葉字當音式  
涉反今人讀爲枝葉之葉者誤

唐于知微碑

右碑殘缺卽姓名亦不可見有五代祖謹知爲于氏及  
考趙錄目註建碑年月始定爲知微也父立政見志  
傳知微自釋褐歷官至兗州都督皆有惠政撰文者姚  
崇也未云平生言行實僕所知揄揚事功則吾豈敢竊

謂不知其人視其友武氏之臣苟爲姚宋所與建碑庶  
幾不媿惜三原之鄉人鑒泐其文爲無識也公侯子孫  
非奇才異績不得附見國史向錄大猷碑喜于氏復得  
三人此碑云子克勤克構克懋皆顯官合知微而四于  
氏之傳于今者非碑版之故耶于氏諸碑皆在今三原  
縣墓上

唐易州刺史田仁琬德政碑

右碑趙氏錄目云田仁琬而予所收之碑則名琬字勤  
禮未知何以去此仁字也豈田琬別有其人而撰文者  
徐安貞行書爲蘇靈芝又與趙錄無異所弗解也宣和  
書譜云蘇靈芝儒生也嘗爲易州刺史郭明肅書候臺

記有二王法在當時必書名藉甚考究字體宜詳而此碑有恬淡者道之符按顏氏干祿字書符符上人姓下符契晉蒲洪之孫堅背有草付字改姓符爾雅符鬼目草名本草云一名篇符此云道之符宜從竹如禮記仲尼燕居篇萬物服體註萬物之符是也然漢碑隸字率以竹爲竹鮮從竹者如符節字皆然以是正書亦時用竹如前漢書符瑞之符與此碑同而符融之姓又從竹或古者二字蓋通用也

唐雲麾將軍李秀碑

右李秀碑在順天府廨中春明夢餘錄曰李秀字元秀范陽人以功拜雲麾將軍左豹韜衛翊府中郎將封遼



西郡開國公開元四年卒葬范陽之福祿鄉靈昌郡太守李邕文并書逸人太原郭卓然模勒并題額趙錄則云明皇以天寶三年改年爲載此碑元年正月立而稱元載何哉按蘇題撰涼國長公主碑云開元十二載前此二十年亦稱載者文字中偶一用之與此同也又按李邕撰靈巖寺碑頌在天寶元年亦曰靈昌郡太守而新舊史止云天寶中邕爲汲郡北海二太守可以補兩書之闕劉侗帝京景物畧曰萬歷初宛平令李蔭署中掘地得六礎洗視乃此碑存者百八十餘字額存唐故雲三字築室砌之壁間名曰古墨齋後移少京兆署中止二礎其四礎相傳萬歷末年王京兆惟儉攜之大梁

子從嘉興項氏得拓本有額唐故雲三字比今碑字多  
三之二爲項墨林珍玩云。

### 唐兗公頌

右碑隸額兗公之頌四字橫書朝議郎行曲阜縣令張  
之宏撰包文該書碑云公姓顏字子泉唐人以高祖諱  
故陶淵明亦作泉明開元二十七年八月制謚孔子爲  
文宣王贈顏子淵兗公閔子騫費侯冉伯牛鄆侯冉仲  
弓薛侯冉子有徐侯仲子路衛侯宰子我齊侯端木子  
貢黎侯言子游吳侯卜子夏魏侯又贈曾參顏孫師等  
六十七人爲伯見舊唐書儀禮志此頌乃兗州都督渤海  
李公誨立其文有曠志鵬海服膺蟻樹按學記蛾子

時術左傳蛾析蛾皆讀蟻此直用蟻蓋正書非篆隸也  
又云猥飛聲于密賤家語史記皆作宓不齊字子賤顏  
氏家訓云子慮子賤卽慮義之後俗字爲宓或復加山  
今兗州永昌郡爲古單父地東門有漢立子賤碑乃云  
濟南伏生卽子賤之後知慮之與伏古來通字今誤以  
爲宓耳夫慮之爲宓尙以爲誤轉而加山益又誤矣然  
唐孫強增減顧野王玉篇亦云宓今作密故句容令岑  
君碑云驅密賤于後塵當時相襲詎知誤乎末有邵王  
文學文宣公孔璣芝乃孔子三十五代孫字藏輝襲封  
褒聖侯改夫子諡時亦改爲公也予謁顏子廟奕然輪  
奐後多名人科甲而此碑反在孔廟大成殿中未知何

故

唐貞一先生廟碑

右貞一先生者司馬承禎也按李元靜碑云陶隱居以三洞真法傳昇元先生昇元付體元先生體元付正一先生正一卽貞一貞正二字當時通用如貞觀亦稱正觀也

唐東方朔畫贊記

右記晉夏侯湛撰顏真卿書唐諱御名取重行文至無可避處往往缺一筆以存其意魯公于此記民字一見則缺末筆世字三見宏字一見皆不缺且此記載昭明文選中集古錄云較選本二字不同而義無異按選本

曰神交造化此云神友選本云棄俗登仙此云棄世登仙夫因避諱而改古人之文或有之矣此則改前文以犯諱何也

唐宴濟瀆記

右碑額篆書有唐濟瀆之記題云游濟瀆記吏部侍郎達奚珣文右監門衛兵曹參軍薛希昌八分書其文拖沓義非元遠如所謂四瀆資我而成彼三水者又云似若非深舟楫既加乃知無底等語固不足窺韓柳之藩籬卽元白亦當吐棄之八分肉勝于骨波磔雖橫而古法漸亡矣

唐梁思楚碑

右碑衛秀集王右軍書集古錄云秀筆工之善模者也其自謂集書信矣無足多取也趙云思楚集者誤

唐王粲石井欄記

右石井欄記共三首其一甄濟則彭朝議書其一于頔則胡証書其一盧鈞趙錄于鈞記之下不著書人姓名予考此記乃京兆府武功縣尉李掖書也胡証八分書後有河南公元和二年八月廿六日進封燕國公隨軍屈賁書一行河南公者卽証也

唐太尉李光弼碑

右李光弼碑顏真卿撰張少悌書按史光弼營州柳城人父楷洛爲契丹酋長武后時入朝而碑云京兆萬年

人父楷洛薊郡開國公未嘗言契丹酋長也地理志柳城郡于萬歲通天元年爲契丹所陷開元五年還治大都督府楷洛于武后時入朝柳城陷未久不應卽爲酋長旣陷後又安得入朝也或以入朝後附籍京兆而酋長之說魯公爲臨淮諱故并其舊籍而逸之耶史云楷洛贈營州都督諡忠烈碑云贈幽州都督而無諡又云兄遵直遵沂弟光琰光彥光進子義忠彙而史但稱光進與彙詳貴也夫臨淮雖與汾陽齊名戰功尤爲中興第一如斬侍御史崔衆賞郝廷玉之碑將援矛者壁野水度還軍以避李日越之劫其膽識出諸將上碑皆畧之顏公筆弱不能如司馬子長韓彭諸將傳使千載下

鬚眉如見也

唐小字麻姑仙壇記

右碑高六寸廣尺許相傳爲玉版可入懷袖唐顏魯公真卿撰書共九百餘字字甚小有尋丈之勢爲魯公正書第一碑在麻姑山觀中宋末觀圯吳道士攜置雲崖山遂流落青綏東平間明永樂中爲薊州衛知事雷豫所得其子泰示撫州守謝士元以巨石函置之外刻詠碑諸公如宋曾文定輩李說書觀劉郎中涇李丞相綱潘邠老大臨明謝戶部磐左吏部贊詩與書皆足附魯公之後而士元則戶部子也集古錄云顏公忠義之節皎如日月而不免惑于神仙釋老之說予觀魯公使李



希烈時見危授命非深于二氏之說者不能夫富貴不  
淫貧賤不移威武不屈二氏之教與吾儒同也以魯公  
而猶謂之惑乎卽此碑石旣失復歸諒不止魯公忠義  
之所感召抑有神人如麻姑者狡獪于其間乎

金石錄補續跋卷第七

崑山葉奕苞九來著

唐宋璟碑

唐八關齋會記

唐乞題放生池額表

唐徐浩先塋題名

唐兵部尙書王忠嗣碑

唐元靖李先生碑

唐重模延陵季子墓刻

唐重修延陵季子廟記

唐臧懷恪碑

唐顏氏家廟碑

唐李公懋功昭德頌

唐姜嫄公劉廟碑

唐鹽池靈應公神祠碑

唐澄城令鄭君德政碑

唐少林寺廚庫記

唐送李愿歸盤谷序

唐顏杲卿碑

唐西平王李晟碑

唐李祐墓誌

唐義陽郡王符璘碑

唐蔚州刺史馬紆墓誌

唐宋璟碑

右廣平郡公宋璟碑顏真卿撰并書大厯七年建十三年魯公復爲碑側記在沙河墓上予讀唐史至文貞傳每歎武后淫亂之朝中宗庸下之主有姚宋毗輔知無不言遂登上理然姚善於應變遠遜文貞守正不阿強哉矯也以碑證傳互有脫漏如史云張易之誣魏元忠引證張說公語說以名義時人呼易之爲五郎而稱之曰卿韋月將告武三思亂宮掖不奉詔以救之王仁皎卒諫止用竇孝謙故事皆公志節所繫而碑遺之至遷殿中侍御史同列有博于臺中者天后將黜之公獨引

過神龍復辟讓封不受改貝州刺史與數人同辭三思  
獨揖公住公竟出太平長公主有異謀遂奏婦人干政  
恐生禍階男又縱橫公執奏之及碑側所記必歷歷在  
人耳目間修史者有何避忌而不之載也當請窮治易  
之兄弟時武后蒼皇欲起遽令之出者新史曰姚璿舊  
書曰楊再思碑止書內史而逸其名若李邕曰陛下坐  
則天下安起則天下危詳述其詞蓋楊善隱惡之意寓  
焉以公之忠直諸子皆不肖歿後三十五年孫儼始爲  
樹碑雖公名在天壤不以碑爲久遠然過公之里拜公  
之墓讀斯碑而興起者未嘗不以魯公之文而歆噓長  
太息也

唐八關齋會記

右碑題云有唐宋州官吏八關齋會報德記行撫州刺史魯郡開國公顏真卿撰并書後題篆書云唐宋州刺史徐向及官吏奉爲汴宋觀察使右僕射信都王八關齋會報德記信都王者田神功也神功傳事母至孝收滄德攻相州拒杏園守陳留襲南德信討劉展攻敬釭及所歷官爵皆與碑合又謂神功寢疾宋之將吏爲禳祈報恩者卽此記也記云八關齋會者公疾良已之所建也宋州刺史李岑爲賊所圍破其黨而有造于州人不資齋明何以報德五月八日首以俸錢三萬設大會飯千僧於開元寺州縣官吏長史苗藏實等設一千五

百人爲一會鎮遏團練官健副使孫琳等設五百人爲一會百姓等設五千人爲一會按代宗大厯中王縉元載杜鴻漸等喜飯僧徒以福業報應熒惑上聽嘗令僧百餘人于宮中陳設佛像經行念誦謂之內道場州郡將吏尤而效之故雖魯公之賢忘其習俗之陋而爲此記良足慨已齊武帝永明元年五月于華林園設八關齋註云釋氏之戒一不殺生二不偷盜三不邪淫四不妄語五不飲酒食肉六不著花鬘纓絡香油塗身歌舞倡伎故往觀聽七不得坐高廣大床八不得過齋後喫食已上八戒故爲八關雜錄名義云八戒者俗衆所受一日一夜戒也謂八戒一齋通謂八關明以禁防爲義

也今日叢林以臘月八日四月八日名冬夏結制而設戒期自六戒以下不聞于世然有過午不食之說非卽第八戒之意乎

唐乞題放生池額表

右表云上元元年七月十七日銀青光祿大夫行尚書刑部侍郎柱國丹陽縣開國侯臣顏真卿上按史真卿自馮翊太守轉蒲州刺史封丹陽縣開國子而此表與祭姪季明文皆云開國侯爲史之誤趙氏目云大歷九年因真卿爲放生池碑文在大歷中也

唐徐浩先塋題名

右徐浩題云至德二年上在鳳翔制應扈從

關字

中書



門下

字

上各贈父祖一人官

字

任中書舍人兼尚

書右丞集賢殿學士正月廿八日制贈公吏部侍郎蓋

浩在肅宗初以襄陽太守

新史云

召拜中書兼右丞所

云贈公者必其祖也而惜闕其名又云及上還京廣德

元年八月廿一日制復贈公嗣子故銀青光祿大夫洛

州刺史上柱國嶠之左散騎常侍由祖而下故稱父爲

嗣子也又云洛州府君歷典趙衢豫吉湖洛六州開元

廿四年薨葬于洛陽石橋東北十里舊書止云嶠至洛

州刺史新史并闕嶠之官闕又云浩自吏部侍郎貶明

州別駕歸鄉拜掃換山口碣題此額篆仍錄贈官其勅

詞並存于別記云大歷九年十月丁卯朔六日壬申刻

曾孫琯模勒姪孫璟檢校隴西李坦然鑄按肅宗紀至德二載十二月靈武元從蜀郡扈從官三品以上予一子官四品以下一子出身又賜文武官階勳爵不及祖父非勸也觀此碑正月中已行之特史軼書耳代宗紀廣德元年賜內外官階勳爵而不及贈與前紀同据此可以補史之闕

唐兵部尙書王忠嗣碑

右王忠嗣碑中書侍郎元載撰門下侍郎王縉書按忠嗣初名訓賜今名李林甫惡之陰使人誣告欲奉太子帝怒付三法司鞠治應死哥舒翰請以官爵代贖罪貶漢陽太守久之遷漢東郡年四十五而卒碑多不詳忠

嗣功在社稷知祿山有亂萌不免以譏死史官惜之載  
爲忠嗣女夫碑文宏麗其敘述處多與史合至云借公  
爲資動搖國本成公謫居人無不恨以四語易史傳數  
行微而顯矣縉書優入晉室惜模拓旣久其波磔盡亡  
耳

唐元靖李先生碑

右碑在茅山玉晨觀中顏真卿撰并書碑云先生諱含  
光廣陵江都人從司馬鍊師盡得其道元宗詔居王屋  
後請居茅山元靖其賜號也按傳法世系自元靖上溯  
陶隱居凡五葉其升元先生爲王遠知體元先生爲潘  
師正正一先生爲司馬子微史家皆爲立傳惟元靖無

傳耳予嘗游茅山過雷平池登伏龍岡弔先生墓慨然  
有遺世之想碑中所謂靈芝甘露固不可復得卽紫陽  
之東鬱岡山上齋壇仙院亦改舊觀惟穹碑屹峙聲施  
至今使非魯公之書恐亦不能久遠如是故古之銘碑  
樹碣者必托諸大手筆也歟碑云先生孩提則有殊異  
晬日獨取孝經如捧讀焉此俗吾吳尤甚凡子女晬日  
率召親戚筵宴設書冊刀悅果餌之類以試之窮鄉委  
巷皆然讀此碑而思先王緣情制禮所謂三千三百者  
朝廟猶存其畧至於家人之禮蕩然無遺而桑弧蓬矢  
以射四方之意歷千年不變然後歎父母愛子之情最  
爲真挚也夫

唐重模延陵季子墓刻

右季札墓碑流傳已久歐陽公疑孔子未嘗至吳以此碑爲妄而陶淵明季札贊云夫子戾止爰詔作銘似夫子曾至吳銘此墓也唐蕭定撰季子廟記云哲人其萎表墓著嗚呼之義蓋指此碑或云延陵之墓四字後世妄增者皆文人好辯云爾予謂西漢以後墓碑始有文字皆屬夸詞此十字言簡意盡非聖人不能宋太宗勒入法帖必有以也

唐重修延陵季子廟記

右季子廟記唐潤州刺史蕭定字梅臣撰試大理司直張從申書記云舊以泰伯之廟在干蘇臺季子之祠像

設東面非由典禮云云似有改作而不詳其處今橫山  
越溪之間臺與祠廟皆不可問閭門內僅有泰伯廟不  
聞有季子祠碑亦無考記曰泰伯之讓讓以賢季子之  
讓賢以讓論議甚精用字未醒如曰讓子賢賢而讓不  
待申其說而豁然矣從申正書大類李北海當時藉甚  
而集古錄云得其所書之碑輒棄之何也

### 唐臧懷恪碑

右碑題云唐故右武衛將軍贈工部尚書上柱國上蔡  
縣開國侯臧公神道碑撫州刺史顏真卿撰并書李秀  
巖篆額懷恪字貞節東莞人以右武衛將軍封上蔡縣  
侯其贈尚書則以第七子希讓貴蓋薨于開元十二年

而碑立于廣德元年之十月全錄詔書示優異也都少卿穆云臧氏糾宗碑所敘七子與此不同駱天驥糾宗碑跋云自靈州君寵而下悉載于碑据此云祖君寵皇通議大夫靈州長史曾祖滿隋驃騎將軍旣曰糾宗曷爲遺曾而錄祖豈止敘本朝不及隋以上也耶糾宗碑亦魯公撰書不應互異惜不得模本證之碑敘臧氏僖哀二伯文武兩仲其下列丈人子原義和榮緒諸人按莊子文王觀于臧見一丈人釣李軌云臧地名也則其人者乃臧之釣叟非卽其姓況下距魯隱公殆四百年不得信以爲公子彊之後世民二字至高宗時卽非連及並諱之而虎字則諱于貞觀中或全去此字或缺一

筆凡碑皆然此曰世祀宜哉又曰猛奪虢虎竟弗之避何也

唐顏氏家廟碑

此碑大書深刻歷年雖遠字畫完好足貴也真卿爲惟貞第七子碑中直書祖父名所謂臨文不諱者然乎今之人文與書遠不及魯公偶述其祖父行畧而輒令他人填諱者又何也

唐李公懋功昭德頌

右額云大唐鎮國軍隴西節度使右僕射李公懋功昭德頌題云大唐潼關鎮國軍隴右節度使檢校尙書右僕射兼御史大夫華州刺史武康郡王李公懋功昭德



頌并序張濛撰韓秀弼八分書李彝篆額貞元五年十月十一日建行軍司馬董叔經請于朝而立此頌也序元諒徇國之功十皆隱約其詞與舊書合彬彬郁郁有初唐風新書云贈司空諡莊威碑不之及豈立于元諒未卒時耶元諒安息人少爲宦官駱奉先養息姓駱名元光德宗念其勦勞賜姓改名碑亦弗諱舊書初加檢校工部尙書新書實封五百戶皆碑所遺

唐姜嫄公劉廟碑

右姜嫄廟碑唐高郢撰張誼書碑云姜嫄嘗出游見跡而履之按毛公註生民詩履帝武敏歆之句曰帝高辛氏之帝也敏疾也從于帝而見于天將事齊敏也以爲

從高辛氏郊禱求子而生后稷其說本自明白至鄭氏箋云帝上帝也敏拇也祀郊禱時有大人之跡姜嫄履之足不能滿其拇指之處心體歆歆然如有人道感已遂有身而生子說殊怪誕蓋出于司馬子長本紀歐陽公謂稷契非高辛之子毛公于史記既不取其履足之怪而取其訛謬之世次第毛公趙人爲河間獻王博士在司馬子長之前數十年未必見史記世次而世次之說出于世本其書在宋時已亡矣朱紫陽幽風集註云后稷生不窋不窋生鞠陶鞠陶生公劉而史記止云不窋卒子鞠立鞠卒子公劉立無下陶字集註云自公劉居幽後十世而太王徙居岐山之陽十二世而文王始

受命與史記合而此碑云公劉者周文王之十代祖也  
未知何據

唐鹽池靈應公神祠碑

右碑題云大唐河東鹽池靈慶公神祠頌并序將仕郎  
太常博士崔敖撰將仕郎前試大理評事韋縱書并篆  
額貞元十三年八月廿日建序云鹽池之數有九七在  
幽朔二陂河東又云雪野霜地歸于塗潦泉貨之廣沒  
于齊人皇家不賦百三十載元宗御國五十年姦生薊  
上嗣聖受命以兵靜之雖田征益加而軍實不足遂收  
鹽鐵之算食貨志唐有鹽池十八井六百四十皆隸度  
支則不止九池亦不至肅宗始收其利第有乾元元年

第五琦初變鹽法之語碑之所云似乎指此碑又云戶部尙書裴公延齡權九州之賦林鹽之饒以河中爲會府按裴傳極言其橫斂罔上如負庫抽貫苗錢市草陂乃本分錢敕索和雇等而未嘗一言鹽權卽食貨志列陳少游劉晏包佶李錡李巽皇甫鏞張平叔盧宏司空輿周墀裴休等而不及延齡豈非言利之臣庸主信任有司側目此碑不得不倚以爲重而特舉其名也耶傳曰君子惡居下流有以夫趙錄靈慶作靈應者誤

唐澄城令鄭君德政碑

右碑題云大唐同州澄城縣令鄭公德政碑銘并序司封郎中集賢殿學士陳京撰衛尉卿鄭雲逵書姜儋模

勒并刻字後云左司郎中宇文邕修功善狀守令白潛  
成立鄉貢進士姜元素篆額貞元十四年正月廿四日  
建鄭公字叔敖字上當碑裂處缺二字卽換字上亦裂  
據趙目而知其爲陳京也碑云百姓孫上良等報德誠  
明請命朝省斯頌作焉殆奉詔立碑曾下考功而非後  
世士民擅立去思也文旣簡快書復遒逸石雖斷裂丰  
骨具在亦陝碑之僅存者矣

唐少林寺廚庫記

右碑顧少連撰崔旼書史鎬篆額其文云少林寺者權  
輿于太和中廢于承光更名于大衆錫田于開皇按夏  
赫連昌北齊幼主高恒皆號承光夏在太和之前則此

承光爲恒也第後主緯武平七年十二月改元隆化卽  
議禪位次年正月乙亥恒卽位改元承光乙丑周師至  
紫陌橋癸巳燒城西門太上皇東走其日幼主禪位于  
任城王潛令侍中斛律孝卿送禪文於瀛州孝卿以之  
歸周不應于承光改元數日間廢寺末云時貞元戊寅  
歲皇帝纘服之廿載也說文廿二十并也古文省後人  
直以爲二十用按德宗乙丑改元貞元至戊寅止十四  
年從庚申卽位至戊寅乃十九年此云廿載亦舉成數  
以爲言耳

唐送李愿歸盤谷序

右碑今在濟源縣解其末云貞元辛巳歲建丑月渤海

高從口口顧亭林曰乃書者之名而石缺之也趙錄云正書無姓名者豈未見此末行耶

唐顏杲卿碑

右碑杲卿弟真卿撰碑言公被害懸首于右金吾街樹有張濬收其髮謁元宗歸之夫人夫人疑之憑牀而哭忽聞聲如鞭牀者髮箱跳而前其事不載于舊史而新史亦簡畧魯公爲杲卿弟其說當不誣也偶閱魯公祭姪季明文有元吳興陳繹曾跋云購杲卿尸于洛陽河北僅得一足與張濬所歸髮葬長安鳳棲里按泉明購屍時問之行刑者云杲卿死時先斷一足故泉明啟履謙之瘞以無足者爲驗此云僅得一足似誤顏氏一門

忠孝爲有唐之冠魯公之文永垂不朽矣

唐西平王李晟碑

右李晟碑裴度撰柳公權書并篆額按晟卒于貞元九年碑立于太和之三年相去已三十七年矣以晟之功蓋天地名震華夷子孫衆多門吏貴盛而卒之日不爲建碑墓上何也新舊史晟子十五人碑則十二非聽之請將勞臣茂績不及二氏之碑充滿于紺宮紫觀乎史云上思晟勳力製紀功碑俾皇太子書之刊石立于東渭橋久已滅沒而此碑尙存非晟之幸乎所歷官階碑傳率多不合傳所畧者事王忠嗣李抱玉初署三府右職蓋史書其大不錄宜也至贈太師謚忠武爲主恩巨



典而碑遺之何耶晉公之文不能風發電掣凜凜有生  
氣特以誠懇書法爲古今所重故此碑保護至今猶得  
不仆然歷歲滋久不無剝蝕其波磔漸失矣惜哉

唐李祐墓誌

古誌趙氏云據李愬傳愬候祐獲于野遣史用誠伏壯  
騎三百擒之而誌云祐潛布欵誠于愬以某日歸命其  
就執也願得傷一支以爲解不然妻子之在賊城無遺  
類矣愬許之追至唐州同執者十二人命斬于牙門外  
次至祐大叫謂愬曰公背初約耶釋之與語終日卽署  
爲都知兵馬使二說不同未知孰是也予以爲誌近是  
是時吳元濟殺蘇兆囚侯惟清悉兵四出淮蔡魚爛三

輔驛騷德宗雖命烏重允李光顏諸將以重兵壓其境  
仍使中人監軍王師屢潰不得吳秀琳等之降卽裴度  
李愬無以成功按吳少誠傳愬畧興橋得守將李祐不  
殺引至帳下計議始謀襲蔡與此誌合始謀云者未得  
祐之前不知賊之虛實不敢襲也然則祐之降可信矣  
李愬恃功橫訴至斲韓昌黎平淮蔡頌其家傳墓碑必  
張大勲伐以降爲擒耳如童重質凌朝江等各貶司戶  
史特爲祐立傳固與賊黨異矣况誌行于當日豈容虛  
謬不比史家得之傳聞于異代也

唐義陽郡王符璘碑

右符璘碑唐中書侍郎李宗閔撰翰林學士柳公權書

誠懸書大達法師碑不免有怒張之氣米南宮呼爲惡  
札此碑結構正密神理駿發模刻又極精良可寶也碑  
云公諱璘字元亮沂州臨沂人傳云瑯琊人蓋傳舉其  
郡而碑舉其州與縣也碑云璘在田悅軍中并州帥馬  
燧以犀帶遺公爲約而傳畧之傳云璘與父令奇啗臂  
別而碑不載豈作史者欲形其父子之忠義而粉飾之  
也耶

唐蔚州刺史馬紆墓誌銘

右碑題云唐故銀青光祿大夫使持節蔚州諸軍事行  
蔚州刺史兼御史中丞馬公墓誌銘朝請大夫使持節  
汾州諸軍事守汾州刺史楊倞撰會昌四年七月十日

建序云公諱紆字無畏扶風平陵人曾祖行琰媯州刺史祖千龍平州刺史父寔右驍騎將軍御史中丞公卽中丞廿五子蓋爲魏傅田氏大將以滄帥李全略死子司捷襲位魏師應援紆申欵裴度勸帥歸誠而爲中朝官者惜未附見於田裴傳中寔亦有志歐陽詹撰

葉九來先生金石錄補余既刊入別下齋叢書其續跋則未之見也去年春管君芷湘來言肆中有書二冊題金石錄續跋者未知誰氏所作余意或劉青藜葉石君書耳亟購歸乃先生著也前書收藏家尙多錄本此則并未有稱及之者惟金石萃編載作金石後錄亦不著作者且時屢列金石錄補前意蘭泉司寇亦未深悉也而余一旦獲全書於里閭豈與是書夙有緣耶抑先生之著述將顯而以東槩相感召耶後有周氏仲樾跋言讀書敏求記載金石錄補云云然今所見僅有趙錄而無葉補余嘗徧假敏求記之諸善本薈萃錄之增補跋漏較刊行者多十之四五亦無此條知也是翁當日所

記猶不止此益歎劬書之難窮而又何怪此書之未見  
稱述乎於其刊成聊志數語焉  
道光甲辰春暮海昌蔣光煦跋